

Akhirnya, dia mendapat khabar berita yang pada hari itu, bas yang selalu dia naiki bagi berniaga di pasar, jatuh ke gaung dan semua penumpang meninggal dunia. Dialah satu-satunya yang terselamat kerana tidak naik bas itu, disebabkan dia tergelincir di bendang. Dia bersyukur kerana masih diberi keselamatan oleh Allah s.w.t.

Pada petangnya pula, ada seseorang mencari dia dengan tujuan membeli tauhu. Anehnya, orang itu menginginkan tauhu yang sudah rosak untuk itik-itik ternakannya makan. Semua tauhu yang rosak itu habis dibelinya. Tidak putus-putus pedagang tauhu itu mengucapkan syukur kepada Allah s.w.t, padahal awalnya dia sudah terlebih dahulu berburuk sangka terhadap Allah s.w.t.

عَنْ عُمَرَ بْنِ الْخَطَّابِ، قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ « لَوْ أَنَّكُمْ كُنْتُمْ تَوَكَّلُونَ عَلَى اللَّهِ حَقَّ تَوَكُّلِهِ لَرَزَقْتُمْ كَمَا تُرْزَقُ الطَّيْرُ تَغْدُو خِمَاصًا وَتَرُوحُ بِطَانًا

Daripada Umar r.a, dia berkata, “Saya mendengar Rasullullah menyatakan, ‘Andai kamu benar-benar bertawakal kepada Allah, nescaya Allah akan memberi kamu rezeki sebagaimana Dia memberi rezeki kepada burung. Burung itu pergi dengan perut kosong pada pagi hari dan kembali dengan perut kenyang pada petang hari.’”

(Hadis direkodkan oleh Imam at Tirmizi, dalam *Sunan at-Tirmizi, kitab az-Zuhd, bab Fi at-Tawakuli AlaAllah*, oleh Umar bin al-Khattab, no.hadis 2344, status hasan)

Apakah kunci selepas berikhtiar dan berdoa? **Tawakal.**

Pengajaran yang kita dapat daripada kisah ini adalah kita menyangka doa kita tidak dimakbulkan, tetapi Allah menjawab

doa kita dengan cara yang lain. Kita ambil pengajaran, jangan berburuk sangka terhadap Allah. Ini kerana, Allah sedang mempersiapkan suatu rancangan yang lebih baik berbanding dengan perkara yang kita minta, jauh lebih membahagiakan berbanding dengan perkara yang kita inginkan, lebih istimewa berbanding dengan perkara yang kita damba.

Tuhan yang mengatur jalan hidup, tetapi kita yang menjalani hidup ini. Tuhan yang memilih, namun kita yang memutuskan. Kita yang punya keinginan, tetapi Tuhanlah yang punya hak. Kita yang berikhtiar, tetapi Tuhan yang mengendalikan. Bersabarlah, tawakal, kerana selagi kita tempatkan Tuhan di hati, "kun"-Nya akan dengan mudah kita dapati.

Sekiranya kamu fikir ujian kamu lebih berat daripada orang lain, bererti Allah melihat kamu lebih kuat daripada orang lain.

Jadilah kamu seperti hujan!

Meskipun sering jatuh, namun tidak pernah mengeluh.

Walau kadang-kadang hadirnya dicela,

namun kehadirannya memberi manfaat dan rahmat jua.

Jadilah kamu seperti hujan!

Walau kadang-kadang hadirnya sering dihindari,

Hujan tidak pernah peduli,

tetap kembali dengan sejuta titisan yang bererti.